

**«ՀԱՅՌՈՒՄԿՈԳԵՆԵՐԱՑԻԱ» փակ բաժնետիրական ընկերության կողմից
Երևան քաղաքի Ավան վարչական շրջանի Թումանյան, Քուչակ,
Նարեկացի թաղամասերում ջերմային էներգիայի բաշխման ցանցի
կառուցման լիցենզավորված գործունեությունն իրականացնելու**

Պայմանները

**(Լիցենզիա N 0398, տրված Հայաստանի Հանրապետության
հանրային ծառայությունները կարգավորող հանձնաժողովի
2011 թվականի ապրիլի 27-ի N203Ա որոշմամբ)**

1. Սահմանումներ

Մույն լիցենզիայում մեծատառով գրված հիմնական հասկացությունները սահմանվում են հետևյալ կերպ.

Էներգետիկայի բնագավառ՝ հասարակական ծառայություններ մատուցելու համար էլեկտրական և ջերմային էներգիայի արտադրության (ներառյալ՝ դրանց համակցված արտադրության), էլեկտրական, ջերմային էներգիայի և բնական գազի հաղորդման (փոխադրման) ու բաշխման, էլեկտրաէներգետիկական և բնական գազի ոլորտների համակարգերի օպերատորի ծառայության իրականացման, էլեկտրաէներգետիկայի և ջերմաէներգետիկայի ոլորտներում նոր արտադրական հզորությունների կառուցման կամ վերականգնման, ինչպես նաև էլեկտրաէներգետիկայի, ջերմաէներգետիկայի և բնական գազի ոլորտներում հաղորդման (փոխադրման) կամ բաշխման ցանցերի կառուցման, էլեկտրական էներգիայի և բնական գազի ներկրման և արտահանման գործունեության մեջ ներգրավված տնտեսավարող սուբյեկտների (անկախ դրանց սեփականության ձևից), այդ գործունեությունների իրականացման համար անհրաժեշտ գույքի և էներգետիկական շուկային ծառայություններ մատուցող կառույցների համախումբ:

Հանձնաժողով՝ Հայաստանի Հանրապետության հանրային ծառայությունները կարգավորող հանձնաժողով.

Լիցենզիա՝ Հանձնաժողովի կողմից իրավաբանական անձին տրված փաստաթուղթ, որը հավաստում է էներգետիկայի բնագավառում սահմանված պայմաններով որոշակի գործունեություն իրականացնելու իրավունքը և պարտականությունը.

Լիցենզավորված անձ՝ «ՀԱՅՌՈՒՄԿՈԳԵՆԵՐԱՑԻԱ» փակ բաժնետիրական ընկերություն.

Ֆորս մաժոր՝ արտակարգ և անկանխելի դեպքեր և հանգամանքներ, որոնք ստեղծվել են Լիցենզավորված անձի կամքից անկախ, ներառյալ (սակայն չսահմանափակվելով դրանցով) բնական աղետները, բնության ուժերի արտասովոր ուժեղ դրսևորումները, ինչպես, օրինակ, ջրհեղեղները, երկրաշարժերը, փոթորիկները, պտտահողմերը, նաև

սաբոտաժային գործողություններ, ահաբեկչություններ, պատերազմներ, ապստամբություններ, հասարակական անկարգություններ, գործադուլներ, որոնք խոչընդոտում են Լիցենզավորված անձի գործունեությունը կամ հանգեցնում նրա ստանձնած ցանկացած պարտավորության կատարման ձգձգման կամ դադարեցման՝ հակառակ նրա կողմից գործադրված ջանքերի՝ խուսափելու, թուլացնելու կամ վերացնելու այդ ուժերի ազդեցությունը:

2. Լիցենզիայի գործողության ժամկետը

- 2.1. Սույն լիցենզիան ուժի մեջ է մտնում 2011 թվականի ապրիլի 27-ից:
- 2.2. Սույն Լիցենզիան գործում է մինչև 2012 թվականի հոկտեմբերի 27-ը:

3. Լիցենզավորված գործունեության պայմանները

- 3.1 Լիցենզիան ուժի մեջ մտնելու պահից Լիցենզավորված անձին իրավունք է տրվում և պարտավորեցվում է կառուցել Երևան քաղաքի Ավան վարչական շրջանի կենտրոնացված ջերմամատակարարման վերականգնման ծրագրի շրջանակում, Երևան քաղաքի Ավան վարչական շրջանի Թումանյանի, Քուչակի, Նարեկացու թաղամասերում ջերմային էներգիայի բաշխման ցանց:
- 3.2 Ջերմային էներգիայի բաշխման ցանցի տեխնիկատնտեսական ցուցանիշները հասկորոշվում են Լիցենզավորված անձի կողմից Հանձնաժողով ներկայացված «Գործարար ծրագիր» փաստաթղթով և սույն լիցենզիայով:
- 3.3 Լիցենզավորված գործունեությունը պետք է համապատասխանի Հայաստանի Հանրապետության օրենսդրությանը, Հանձնաժողովի կողմից սահմանված ու այլ իրավական ակտերին և սույն Լիցենզիայի պայմաններին:
- 3.4 Լիցենզավորված անձը ջերմային էներգիայի բաշխման ցանցի կառուցման աշխատանքները պարտավոր է իրականացնել և հետագայում ջերմամատակարարման (ջեռուցում և տաք ջրամատակարարում) ծառայությունները մատուցել համաձայն Երևան քաղաքի Ավան վարչական շրջանի կենտրոնացված ջերմամատակարարման վերականգնման ծրագրի շրջանակում կազմված նախագծի:
- 3.5 Լիցենզավորված անձը առանց Հանձնաժողովի թույլտվության չի կարող դառնալ Լիցենզիա ունեցող մեկ այլ անձի 25 տոկոս և ավելի մաս կազմող բաժնետեր, փայատեր կամ միավորվել Լիցենզիա ունեցող մեկ այլ անձի հետ:
- 3.6 Լիցենզավորված անձը կանոնադրական հիմնադրամում 25 տոկոս և ավելի մասնակցություն ունեցող բաժնետերը կամ փայատերը առանց Հանձնաժողովի թույլտվության իրավունք չունի ձեռք բերել նույն կամ մեկ այլ Լիցենզավորված անձի 25 տոկոս և ավելի բաժնետոմս, բաժնեմաս կամ ունենալ փայամասնակցություն, ինչպես նաև վաճառել 25 տոկոս և ավելի բաժնետոմսեր:
- 3.7 Լիցենզավորված անձն անմիջապես Հանձնաժողով է հայտնում սույն Լիցենզիայի պայմանների խախտումների, ինչպես նաև խախտումների հանգեցնող հանգամանքների մասին:

- 3.8 Իրավասու մարմինների կողմից իրականացվող վերահսկողության ընթացքում արձանագրված խախտումների մասին Լիցենզավորված անձը 10-օրյա ժամկետում տեղեկացնում է Հանձնաժողովին:
- 3.9 Լիցենզավորված անձը լիցենզավորված գործունեությունն իրականացնում է՝ պահպանելով աշխատանքների ժամանակացույցը և Լիցենզիա ստանալուց հետո՝ յուրաքանչյուր եռամսյակի ավարտից հետո 25-օրյա ժամկետում, հաշվետվություն է ներկայացնում Հանձնաժողով:
- 3.10 Լիցենզավորված անձը Հանձնաժողովի կողմից սահմանված կարգին և ձևերին համապատասխան՝ լիցենզավորված գործունեության մասին հաշվետվություններ է ներկայացնում Հանձնաժողով:
- 3.11 Լիցենզավորված գործունեության հաշվապահական հաշվառումը և հաշվետվությունը պետք է համապատասխանեն Հայաստանի Հանրապետության օրենսդրությամբ սահմանված հաշվապահական հաշվառման ստանդարտներին և Հանձնաժողովի պահանջներին:
- 3.12 Լիցենզավորված գործունեության հաշվապահական հաշվառումը և հաշվետվությունները պետք է առանձնացված լինեն Լիցենզավորված անձի կողմից իրականացվող այլ գործունեության հաշվապահական հաշվառումից և հաշվետվություններից:
- 3.13 Լիցենզավորված անձը ներկայացնում է լիցենզավորված գործունեությանն առնչվող ցանկացած տեղեկություն, որը կպահանջի Հանձնաժողովն իր կողմից սահմանված ժամկետներում և ձևերին համապատասխան:
- 3.14 Հանձնաժողովի պահանջով Լիցենզավորված անձը իրականացնում է լիցենզավորված գործունեության ֆինանսական անկախ աուդիտ և եզրակացությունը ներկայացնում Հանձնաժողով:
- 3.15 Հայաստանի Հանրապետության օրենսդրությամբ սահմանված կարգով Լիցենզավորված անձը պատասխանատվություն է կրում Հանձնաժողով ներկայացրած հաշվետվության և այլ տեղեկատվության հավաստիության համար:

4. Լիցենզավորված գործունեության վերահսկողությունը

- 4.1 Լիցենզիայի պայմանների պահպանման վերահսկումն իրականացնում է Հանձնաժողովն՝ իր կողմից սահմանված կարգով:
- 4.2 Լիցենզիայի պայմանների պահպանման վերահսկումն ապահովելու նպատակով Հանձնաժողովը և նրա կողմից լիազորված ներկայացուցիչներն ունեն ազատ մուտքի իրավունք Լիցենզավորված անձի տարածք:
- 4.3 Լիցենզավորված անձը վերահսկման իրականացման ընթացքում պետք է լիովին համագործակցի և աջակցի Հանձնաժողովին կամ նրա կողմից լիազորված ներկայացուցչին:

5. Տույժեր

- 5.1 «Էներգետիկայի մասին» Հայաստանի Հանրապետության օրենքի պահանջները, Հանձնաժողովի իրավական ակտերը, Լիցենզիայի պայմանները չկատարելու, ոչ

պատշաճ կատարելու կամ խախտելու դեպքում, ղեկավարվելով «Էներգետիկայի մասին» Հայաստանի Հանրապետության օրենքի 42-րդ հոդվածով, Հանձնաժողովը իրավասու է կիրառել հետևյալ տույժերը.

- 1) նախազգուշացում,
- 2) Լիցենզիայի կասեցում,
- 3) Լիցենզիայից զրկում:

5.2 Լիցենզիայի գործողությունը կարող է դադարեցվել Լիցենզավորված անձի նախաձեռնությամբ՝ նրա գրավոր դիմումի հիման վրա:

5.3 Լիցենզավորված անձը չի ենթարկվում պատասխանատվության՝ սույն կարգի 5.1 կետով սահմանված տույժերով, եթե նրա գործունեության մեջ արձանագրված խախտումները ֆորս մաժորային հանգամանքների հետևանք են:

6. Լիցենզիայի դրույթների և պայմանների փոփոխություն

6.1 Լիցենզավորված իրավաբանական անձի վերակազմակերպման կամ նրա անվանման կամ գտնվելու վայրի փոփոխման դեպքում լիցենզավորված անձը պարտավոր է այդ փոփոխություններն իրավական ուժ ստանալու օրվանից սկսած՝ 15 օրվա ժամկետում, հայտ ներկայացնել լիցենզիայի վերաձեւակերպման համար՝ կցելով նշված տեղեկությունները հավաստող համապատասխան փաստաթղթերը:

6.2 Կառուցման ընթացքում ջերմային էներգիայի բաշխման ցանցի տեխնիկատնտեսական ցուցանիշների փոփոխության դեպքում Լիցենզավորված անձն անհապաղ դիմում է Հանձնաժողով՝ համապատասխան փոփոխություններ կատարելու համար:

6.3 Սույն Լիցենզիայում, ինչպես նաև Լիցենզավորված անձի կողմից ներկայացված ծրագրերում, ժամանակացույցերում և այլ փաստաթղթերում կարող են փոփոխություններ կատարվել թե Հանձնաժողովի և թե Լիցենզավորված անձի նախաձեռնությամբ՝ Հանձնաժողովի կողմից սահմանված կարգով:

7. Այլ պայմաններ

7.1 Սույն Լիցենզիայի գործողության ժամկետի երկարաձգման անհրաժեշտության դեպքում Լիցենզավորված անձը պարտավոր է սույն Լիցենզիայի գործողության ժամկետը լրանալուց 30 օր առաջ դիմել Հանձնաժողով՝ ներկայացնելով «Հայաստանի Հանրապետության Էներգետիկայի բնագավառում գործունեության լիցենզավորման կարգով» սահմանված անհրաժեշտ փաստաթղթերը:

8. Ծանուցում

8.1 Լիցենզիայի վերաբերյալ պաշտոնական բոլոր ծանուցումները, հայտերը, պահանջները կամ այլ հաղորդագրությունները Լիցենզավորված անձի կողմից պետք է ներկայացվեն գրավոր և ուղարկվեն սուրհանդակի միջոցով, պատվիրված նամակով կամ առձեռն հանձնվեն Հանձնաժողով: